



11

保 4
5984
8-4



門保4
號5984
卷8-4



東漢會要卷十五

宋 徐 天 麟 撰

歷數中

服色

建武二年立郊兆于城南始正火德色尚赤

本紀注云漢初

土德上黃至此始明火德徽幟上赤色服於是乃正

改元

光武中元元年正月丁卯東巡狩四月癸酉車駕還宮己卯大赦天下改元為中元

章帝元和元年八月癸酉詔曰朕道化不德吏正失

東漢會要卷十五

一

和元元未諭抵罪於下寇賊爭心不怠邊野邑屋不
修永惟庶事思稽厥衷與凡百君子共弘斯道中心
悠悠將何以寄其改建初九年爲元和元年
章和元年七月壬戌詔曰朕聞仁君之德啓迪鴻化
緝熙康乂光照六幽訖惟人面靡不率俾仁風翔於
海表威震行乎鬼區然後敬恭明祀膺五福之慶獲
來儀之貺朕以不德受祖宗宏烈乃者鳳凰仍集麟
麒麟並臻甘露宵降嘉穀滋生芝草之類歲月不絕朕
夙夜祇畏上天無以彰於先功今改元和四年爲章
和元年

和帝元興元年四月庚午大赦天下改元元興

安帝元初元年正月甲子改元元初

永寧元年四月丙寅立皇太子改元永寧

建光元年七月己卯改元建光大赦天下

延光元年二月丙午改元延光大赦天下

順帝陽嘉元年三月庚寅帝臨辟雍饗射大赦天下

改元陽嘉

永和元年正月己巳宗祀明堂登靈臺改元永和大
赦天下

漢安元年正月癸巳宗祀明堂大赦天下改元漢安

建康元年四月辛巳立皇太子改元建康大赦天下

桓帝和平元年正月甲子大赦天下改元和平

元嘉元年正月癸酉大赦天下改元元嘉

永興元年五月丙申大赦天下改元永興

永壽元年五月戊申大赦天下改元永壽

延熹元年六月戊寅大赦天下改元延熹

永康元年六月庚申大赦天下悉除黨錮改元永康

靈帝熹平元年五月己巳大赦天下改元熹平

光和元年三月辛丑大赦天下改元光和

中平元年十二月己巳大赦天下改元中平

中平六年四月靈帝崩皇子辯即帝位改元為光熹

八月辛未改光熹為昭寧九月甲戌董卓廢少帝為

弘農王是日陳留王即皇帝位是為獻帝大赦天下

改昭寧為永漢十二月詔除光熹昭寧永漢三號還

復中平六年

獻帝興平元年正月辛酉大赦天下改元興平

建安元年正月癸酉郊祀上帝於安邑大赦天下改

元建安

二十五年三月改元延康並本紀

時令

立春之日夜漏未盡五刻京師百官皆衣青衣郡國縣道官下至斗食令史皆服青幘立青幡施土牛耕人於門外以示兆人至立夏唯武官不立春之日下寬大書曰制詔三公方春東作敬始慎微動作從之罪非殊死且勿案驗皆須麥秋退貪殘進柔良下當用者如故事

禮儀志

侯霸明習故事條奏前世善政法度有益於時者皆施行之每春下寬大之詔奉四時之令皆霸所建也

本傳

明帝即位詔曰方春戒節人以耕桑其勅有司務順

時令使無煩擾

永平二年祀明堂禮畢登靈臺吹時律其令百寮師尹勉修厥職順行時令敬若昊天以綏兆人

紀

三年春正月癸巳詔曰朕奉郊祀登靈臺見史官正儀度夫春者歲之始也始得其正則三時有成比者水旱不節邊人食寡政失於上人受其咎有司其勉順時氣勸督農桑去其螟蟻以及蝥賊詳刑慎罰明察單辭夙夜匪懈以稱朕意

本紀

東平王蒼聞當遂校獵河內卽上書諫曰臣聞時令盛春農事不聚衆興功傳曰田獵不宿食飲不享出

入不節則木不曲直此失春令者也臣知車駕今出
事從約省所過吏人諷誦甘棠之德雖然動不以禮
非所以示四方也惟陛下因行田獵循視稼穡消搖
仿佯弭節而旋至秋冬乃振威靈整法駕備周衛設
羽旄詩云抑抑威儀惟德之隅臣不勝憤懣伏自手
書乞詣行在所極陳至誠帝覽奏即還宮東平王傳
四年二月詔有司勉遵時政平刑罰紀
十年四月詔曰方勝夏長養之時蕩滌宿惡以報農
功百姓勉務桑稼以備災害吏敬厥職無令愆墮紀
章帝建初元年詔有司順時令理冤獄紀

元和二年正月詔三公曰方春生養萬物葺甲宜助
萌陽以育時物其令有司罪非殊死且勿案驗及吏
人條書相告不得聽受冀以息事寧人敬奉天氣立

秋如故紀

七月庚子詔定律無以十一月十二日報囚詳見斷獄類

十一月壬辰日南至初閉關梁紀

三年二月己丑勅侍御史司空曰方春所過無得有
所伐殺車可以引避引避之騑馬可輟解輟解之詩
云敦彼行葦牛羊勿踐履禮人君伐一草木不時謂
之不孝俗知順人莫知順天其明稱朕意紀

章和元年秋令是月養衰老授几杖行糜粥飲食紀本

注云月令仲秋之令

和帝永元六年六月己酉初令伏閉盡日紀

十五年有司奏以為夏至則微陰起靡草死可以決

小事是歲初令郡國以日北至案薄刑紀又魯恭疏見斷獄類

安帝元初六年詔曰夫政先京師後諸夏月令仲春

養幼小存諸孤季春賜貧窮賑乏絕省婦使表貞女

所以順陽氣崇生長也其賜人尤貧困孤弱單獨穀

人三斛貞婦有節義十斛甄表門閭旌顯厥行紀

順帝永建四年正月詔曰三朝之會朔旦立春務崇

寬和敬順時令遵典去苛以稱朕意

陽嘉中郎顛上言今立春之後火卦用事當溫而寒

違時反節由功賞不至而刑罰必加也宜須立和順

氣行罰顛又言方春東作布德之元王者奉順時氣

宜務崇溫柔遵其行令而今立春之後考事不息秋

冬之政行乎春夏殆非朝廷優寬之本顛又言孔子

作春秋書正月者敬歲之始也王者則天之象因時

之序宣開發德號爵賢命士流寬大之澤垂仁厚之

德順助元氣自立春以來未見仁惠有所施布但聞

罪罰考掠之聲云云本傳

質帝本初元年正月詔曰昔堯命四月以欽天道夫
瑞以和降異因逆感禁微應大前聖所重頃者州郡
輕慢憲防競逞殘暴造設科條陷入無罪或以喜怒
驅逐長吏恩阿所私罰枉仇隙至今守闕訴訟前後
不絕送故迎新人離其害怨氣傷和以至災眚書云
明德謹罰方春東作育微敬始其勅有司罪非殊死
且勿案驗以崇在寬紀

符命

皇考南頓君初爲濟陽令以建平元年十二月甲子
夜生光武於縣舍有赤光照室中欽異焉使卜者王

長占之長辟左右曰此兆吉不可言是歲縣界有嘉
禾生一莖九穗因名光武秀明年方士有夏賀良者
上言哀帝云漢家厯運中衰當再受命於是改號爲
太初元年稱陳聖劉太平皇帝以厭勝之及王莽篡
位忌惡劉氏以錢文有金刀故改爲貨泉或以貨泉
字文爲白水真人後望氣者蘇伯阿爲王莽使至南
陽遙望見春陵郭暗曰氣佳哉鬱鬱葱葱然及始起
兵還春陵望舍南火光赫然屬天有頃不見初道士
西門君惠李守等亦云劉秀當爲天子其王者受命
信有符乎不然何以能乘時龍而御天哉光武紀

東漢書卷五十五
世祖先在長安時同舍生疆華自關中奉赤伏符曰
劉秀發兵捕不道四夷雲集龍鬪野四七之際火爲
主羣臣因復奏曰受命之符人應爲大萬里合信不
議同情周之白魚何足比焉識記曰劉秀發兵捕不
道卯金修德爲天子紀

祥瑞

建武十二年夏甘露降南行唐六月黃龍見東阿
十七年有五鳳凰見於潁川郟縣

中元元年夏京師醴泉湧出飲之者痼疾皆愈惟眇
蹇者不瘳又有赤草生於水涯郡國頻上甘露羣臣
奏言地祇靈應而朱草萌生孝宣帝每有嘉瑞輒以
改元神爵五鳳甘露黃龍列爲年紀蓋以感致神祇
表彰德信是以化致升平稱爲中興今天下清寧靈
物仍降陛下情存損挹推而不居豈可使祥符顯慶
沒而無聞宜令太史撰集以傳來世帝不納常自謙
無德每郡國所上輒抑而不宣故史官罕得記焉
孝明永平六年二月王雒山出寶鼎廬江太守獻之
夏四月甲子詔曰昔禹收九牧之金鑄鼎以象物使
人知神姦不逢惡氣遭德則興遷於商周周德旣衰
鼎乃淪亡祥瑞之降以應有德方今政化多僻何以

致茲易曰鼎象三公豈公卿奉職得其理邪太常其
以祔祭之日陳鼎於廟以備器用

十一年灑湖出黃金廬江太守以獻時麒麟白雉醴
泉嘉禾所在出焉

十七年正月甘露降於甘陵是歲甘露仍降樹枝內
附芝草生殿前神雀五色翔集京師西南夷哀牢僮
耳僬僂槃木白狼動黏諸種前後慕義貢獻西域諸
國遣子入侍五月戊子公卿百官以帝威德懷遠祥
物顯應乃並集朝堂奉觴上壽制曰天生神物以應
王者遠人慕化實由有德朕以虛薄何以享斯唯高

祖光武聖德所被不敢有辭其故舉觴太常擇吉日

策告宗廟

並紀

永平中有神雀集宮殿官府冠羽有五彩色帝異之
以問臨邑侯劉復復不能對薦賈逵博物多識帝乃
召見逵問之對曰昔武王終父之業鶯鷺在岐宣帝
威懷戎狄神雀仍集此降祥之徵也帝勅蘭臺給筆

札使作神雀頌

賈逵傳

章帝建初三年零陵獻芝草

四年甘露降泉陵洮陽二縣

五年零陵獻芝草有八黃龍見於泉陵

七年岐山得銅器形似酒罇獻之又獲白鹿帝曰上無明天子下無賢方伯人之無良相怨一方斯器亦曷為來哉

元和二年正月己未鳳凰集肥城五月戊申詔曰乃者鳳凰黃龍鸞鳥比集七郡或一郡再見白鳥及神雀甘露屢臻祖宗舊事或班恩施其賜天下吏爵人三級高年鰥寡孤獨帛人一匹河南女子百戶牛酒令天下大酺五日

章帝在位十三年郡國所上符瑞合於圖書者數百千所嗚乎懋哉

和帝前後符瑞八十一所自稱德薄皆抑而不宣

安帝延光元年九真言黃龍見無功

二年九真言嘉禾生

東觀記曰禾百五十
六本七百六十八穗

三年濟南上言鳳凰集臺縣丞霍收舍樹上賜臺長帛五十四丞二十四尉半之吏卒人三匹鳳凰所過亭部無出今年田租賜男子爵人二級四月沛國言甘露降豐縣六月扶風言白鹿見雍七月馮翊言甘露降頻陽衙八月潁川上言麒麟一白鹿二見陽翟九月濟南上言黃龍見歷城十月新豐上言鳳凰集西界亭十二月琅琊言黃龍見諸縣

四年正月東郡言黃龍二麒麟一見濮陽

桓帝建和元年二月沛國言黃龍見譙六月芝草生

中黃藏府十一月濟陰言有五色大鳥見於己氏

二年四月嘉禾生大司農帑藏七月河東言木連理

元嘉二年八月濟陰言黃龍見句陽金城言黃龍見

允街

永壽元年四月白鳥見齊國

延熹三年四月上郡言甘露降

八年正月己西南宮嘉德殿黃龍見四月濟陰東郡

濟北河水清

九年四月濟陰東郡濟北平原河水清

永康元年八月魏郡言嘉禾生甘露降巴郡言黃龍

見十一月西河言白兔見

靈帝熹平五年沛國言黃龍見譙

光和四年二月郡國上芝英草七月河南言鳳凰見

新城羣鳥隨之

中平元年郡國生異草備龍蛇鳥獸之形並紀

臣天麟按東郡祥瑞紀不絕書獨光武和帝多抑

而不宣非卓然有見者能之乎觀何做元和中辟

太尉宋由府司徒袁安亦敬重之時京師及四方

累有奇異鳥獸草木言事者以爲祥瑞做通經傳能爲天官意甚惡之乃言於二公曰夫瑞應依德而至異災緣政而生故鸚鵡來巢昭公有乾侯之厄西狩獲麟孔子有兩楹之殯海鳥避風臧文祀之君子譏焉今異鳥翔於殿屋怪草生於庭際不可不察由安懼然不敢荅然則當時崇尚祥異有識君子固所不取也

渾儀

明帝永平十五年七月詔書造太史黃道銅儀以角爲十三度亢十氏十六房五心五尾十八箕十斗二十四四分度之一牽牛七須女十一虛十危十六營室十八東壁十奎十七婁十二胃十五昂十二畢十六觜三參八東井三十輿鬼四柳十四星七張十七翼十九軫十八凡三百六十五度四分度之一冬至在斗十九度四分度之一史官以郭日月行參弦望雖密近而不爲注日儀黃道與度轉運難候以是少循其事

律歷志中

安帝雅聞張衡善術學公車特召拜郎中再遷爲太史令遂乃研覈陰陽妙盡璇璣之正作天儀著靈憲算罔論言甚詳明

張衡傳

蔡邕曰言天體者有三家一曰周髀二曰宣夜三曰渾天宣夜之學絕無師法周髀術數俱存考驗天狀多所違失故史官不用唯渾天者近得其情今史官所用候臺銅儀則其法也靈憲序曰昔先王將步天路用定靈軌尋緒本元先準之於渾體是爲正儀故靈憲作與衡集無算罔論蓋網絡天地而算之因名焉

張衡傳

順帝陽嘉元年衡復造候風地動儀以精銅鑄成員徑八尺合蓋隆起形似酒尊飾以篆文山龜鳥獸之形中有都柱傍行八道施關發機外有八龍首銜銅丸下有蟾蜍張口承之其牙機巧制皆隱在尊中覆蓋周密無際如有地動尊則振龍機發吐丸而蟾蜍銜之振聲激揚伺者因此覺知雖一發機七而首不動尋其方面乃知震之所在驗之以事合契若神自書典所記未之有也嘗一龍機發而地不覺動京師學者咸怪其無徵後數日驛至果地震隴西於是皆服其妙自此以後乃令史官記地動所從方起

張衡傳

東漢會要卷十五

東漢會要卷十六

宋 徐 天 麟 撰

歷數下

天文變異

王莽地皇三年十一月有星孛于張東南行五日不

見本志
下同

四年六月晝有雲氣如壞山墮軍上軍人皆厭所謂

營頭之星也

四年秋太白在太微中燭地如月光

光武建武九年七月乙丑金星犯軒轅大星十一月

乙丑又犯軒轅

十年三月癸卯流星如月從大微出入北斗魁第六
星色白旁有小星射者十餘枚滅則有聲如雷食頃
止十二月己亥大流星如缶出柳西南行入軫且滅
時分爲十餘如遺火狀須臾有聲隱隱如雷

十二年正月己未小流星百枚以上或西北或正北
或東北二夜止六月戊辰小流星百枚以上四面行
十五年正月丁未彗星見昴稍西北行入營室犯離
宮三月乙未至東壁滅見四十九日

三十年閏月甲午水在東井二十度生白氣東南指
炎長五尺爲彗東北行至紫宮西藩止五月甲子不
見凡見三十一日

三十一年七月戊午火在輿鬼一度入鬼中出尸星
南半度十月己亥犯軒轅大星又七日間有客星炎
二尺所西南行至明年二月二十二日在輿鬼東北
六尺所滅凡見百一十三日

中元二年八月丁巳火犯太微西南角星相去二寸
十月戊子大流星從西南東北行聲如雷

孝明永平元年四月丁酉流星大如斗起天市樓西
南行光照地

三年六月丁卯彗星出天舡北長二尺所稍北行至
亢南百三十五日去

四年八月辛酉客星出梗河西北指貫索七十日去

七年正月戊子流星大如杯從織女西行光照地

八年六月壬午長星出柳張三十七度犯軒轅刺天
舡陵太微氣至上階凡見五十六日去

九年正月戊申客星出牽牛長八尺厯建星至房南
滅見至五十日

十三年閏月丁亥火犯輿鬼質星

十四年正月戊子客星出昴六十日在軒轅右角稍

滅

十五年十一月乙丑太白入月中

十六年正月丁丑歲星犯房右驂北第一星不見辛
巳乃見四月癸未太白犯畢

十八年六月己未彗星出張長三尺轉在郎將南入
太微

孝章建初元年正月丁巳太白在昴西一尺八月庚
寅彗星出天市長二尺所稍行入牽牛三度積四十
日稍滅

二月九日甲寅流星過紫宮中長數丈散爲三滅十

一月戊寅彗星出婁三度長八九尺稍入紫宮中百六日稍滅

元和元年四月丁巳客星晨出東方在胃八度歷閣道入紫宮留四十日滅

孝和永元元年正月辛卯有流星起參長四丈有光色黃白二月流星起天棊東北行三丈所滅色青白壬申夜有流星起太微東蕃長三尺三月丙辰流星起天津壬戌有流星起天將軍東北行

二年正月乙卯金木俱在奎丙寅水又在奎辛未水金木俱在婁二月丁酉有流星大如桃起紫宮東蕃西北行五丈稍滅四月丙辰有流星大如瓜起文昌東北行至少微西滅有頃音如雷聲已而金在軒轅大星東北二尺所八月丁未有流星如鷄子起太微西東南行四丈所消十月癸未有流星大如桃起天津西行六丈所消十一月辛酉有流星大如拳起紫宮西行到胃消

三年九月丁卯有流星大如鷄子起紫宮西南至北斗柄間消

五年四月癸巳太白熒惑辰星俱在東井七月壬午歲星犯軒轅大星九月金在南斗魁中火犯房北第

一星

七年正月丁未
有流星起天津人紫宮中減色青黃
有光二月癸酉金火俱在參戊寅金火俱在東井八月甲寅水土金俱在軫十一月甲戌金火俱在心十二月己卯有流星起文昌人紫宮消丙辰火金水俱在斗

十一年五月丙午
流星大如瓜起氏西南行稍有光
白色

十二年十一月癸酉
夜有蒼白氣長三丈起天園東北指軍市見積十日

十三年十一月乙丑
軒轅第四星間有小客星色青黃

十六年四月丁未
紫宮中生白氣如粉絮戊午客星出紫宮西行至昴五月壬申滅七月庚午水在輿鬼中十月辛亥流星起鉤陳北行三丈有光色黃

元興元年二月庚辰
有流星起角亢五丈所四月辛亥有流星起斗東北行到須女七月己巳有流星起天市五丈所光色赤閏月辛亥水金俱在氏流星起斗東北行至須女

孝殤延安元年正月丁酉
金火在婁

孝安永初元年五月戊寅熒惑逆行守心前星八月
戊申客星在東井弧星西南

二年正月戊子太白晝見

三年正月庚戌月犯心後星己亥太白入斗中十二
月彗星起天苑南東北指長六七尺色蒼白

四年六月甲子客星大如李蒼白芒氣長二尺西南
指上階星癸酉太白入輿鬼

五年六月辛丑太白晝見經天

元初元年三月癸酉熒惑入輿鬼

二年九月辛酉熒惑入輿鬼中

三年三月熒惑入輿鬼中五月丙寅太白入畢口七
月甲寅歲星入輿鬼閏月己未太白犯太微左執法

十一月甲午客星見西方己亥在虛危南至胃昴

四年正月丙戌歲星留輿鬼中乙未太白晝見丙上

四月壬戌太白入輿鬼中己巳辰星入輿鬼中五月

己卯辰星犯歲星六月丙申熒惑入輿鬼中戊戌犯

輿鬼大星九月辛巳太白入南斗口中

五年三月丙申鎮星犯東井鉞星五月庚午辰星犯

輿鬼質星丙戌太白犯鉞星

六年四月癸丑太白入輿鬼六月丙戌熒惑在輿鬼

中丁卯鎮星在輿鬼中辛巳太白犯左執法

延光二年八月己亥熒惑出太微端門

三年二月辛未太白犯昴五月癸丑太白入畢九月
壬寅鎮星犯左執法

四年太白入輿鬼中六月壬辰太白出太微九月甲
子太白入斗口中十一月客星見天市

孝順永建二年二月癸未太白晝見三十九日閏月
乙酉太白晝見東南維四十一日八月己巳熒惑入
輿鬼

六年四月熒惑入太微中犯左右執法西北方六寸

所十月乙卯太白晝見十二月壬申客星芒氣長二
尺餘西南指色蒼白在牽牛六度

陽嘉元年閏月戊子客星氣白廣二尺長五丈起天
苑西南

永和二年五月戊申太白晝見八月庚子熒惑犯南
斗

三年二月辛巳太白晝見戊子在熒惑西南光芒相
犯辛丑有流星大如斗從西北東行長八九尺色赤
黃有聲隆隆如雷三月壬子太白晝見六月丙午太
白晝見八月乙卯太白晝見閏月甲寅辰星入輿鬼

己酉熒惑入太微乙卯太白晝見

四年七月壬午熒惑入南斗犯第三星

五年四月戊午太白晝見八月己酉熒惑入太微

六年二月丁巳彗星見東方長六七尺色青白西南

指營室及墳墓星丁丑彗星在奎一度長六尺癸未

昏見西北厯昂畢甲申在東井遂厯輿鬼柳七星張

光炎及三台至軒轅中滅

漢安二年正月己亥太白晝見五月丁亥辰星犯輿

鬼六月乙丑熒惑光芒犯鎮星七月甲申太白晝見

孝質本初元年三月癸丑熒惑入輿鬼四月辛巳太

白入輿鬼五月庚戌太白犯熒惑

孝桓建和元年八月壬寅熒惑犯輿鬼質星

二年二月辛卯熒惑行在輿鬼中

三年五月己丑太白行入太微右掖門留十五日

出端門丙申熒惑入東井八月己亥鎮星犯輿鬼中南

星乙丑彗星芒長五尺見天市中東南指色黃白九

月戊辰不見

元嘉元年二月戊子太白晝見

永興二年閏月丁酉太白晝見

永壽元年三月丙申鎮星逆行入太微中七十四日

去左掖門七月己未辰星入太微中八十日去左掖門八月己巳熒惑入太微二十一日出端門

二年六月甲寅辰星入太微遂伏不見八月戊午太白犯軒轅大星

三年四月戊寅熒惑入東井口中其七月丁丑太白犯心前星

延熹四年三月甲寅熒惑犯輿鬼質星五月辛酉客星在營室稍順行生芒長五尺所至心一度轉爲彗六年十一月丁亥太白晝見

七年七月戊辰辰星犯歲星八月庚戌熒惑犯輿鬼

質星庚申歲星犯軒轅大星十月丙辰太白犯房北星丁卯辰星犯太白十二月乙丑熒惑犯軒轅二星八年五月癸酉太白犯輿鬼質星壬午熒惑入太微右執法閏月己未太白犯心前星十月癸酉歲星犯左執法十一月戊午歲星入太微犯左執法

九年正月壬辰歲星入太微中五十八日出端門六月壬戌太白行入輿鬼七月乙未熒惑行輿鬼中犯質星九月辛亥熒惑入太微西門積五十八日

永康元年正月庚寅熒惑逆行入太微東門留太微中百一日出端門七月丙戌太白晝見經天

孝靈帝建寧元年六月太白在西方入太微犯西蕃南頭星

熹平元年十月熒惑入南斗中

二年四月有星出文昌入紫宮蛇行有首尾無身赤色有光照垣牆八月丙寅太白犯心前星辛未白氣如一匹練衝北斗第四星

光和元年四月癸丑流星犯軒轅第二星東北行入北斗魁中八月彗星出亢北入天市中長數尺稍長至五六丈赤色經歷十餘宿八十餘日乃消於天苑中

三年冬彗星出狼弧東行至於張乃去

五年四月熒惑在太微中守屏七月彗星出三台下東行入太微至太子幸臣二十餘日而消十月歲星熒惑太白三合於虛相去各五六寸如連珠

光和中國皇星東南角去地一二丈如炬火狀十餘日不見

中平二年十月癸亥客星出南門中大如半筵五色喜怒稍小至後年六月消

三年四月熒惑逆行守心後星十月戊午食心後星五年二月彗星出奎逆行入紫宮後三出六十餘日

乃消六月丁卯客星如三升椀出貫索西南行入天市至尾而消

中平中夏流星赤如火長三丈起河鼓入天市抵觸宦者星色白長二三丈後尾再屈食頃乃滅狀似枉矢

六年八月丙寅太白犯心前星戊辰犯心中大星孝獻初平三年九月蚩尤旗見長十餘丈色白出角亢之南

四年十月孛星出兩角間東北行入天市中而滅建安五年十月辛亥有星孛于大梁

九年十一月有星孛于東井輿鬼入軒轅太微
十一年正月星孛于北斗首在斗中尾貫紫宮及北辰

十二年十月辛卯有星孛于鶉尾

十七年十二月有星孛于五諸侯

十八年秋歲星鎮星熒惑俱入太微逆行畱守帝坐百餘日

二十三年三月孛星晨見東方二十餘日夕出西方犯厯五車東井五諸侯文昌軒轅后妃太微鋒炎指帝坐

隕石

身漢會要卷二十六
二十
殤帝延平元年九月乙亥隕石陳畱四春秋僖公十六年隕石于宋五傳曰隕星也董仲舒以為從高及下之象或以為庶人惟星星隕民困之象也桓帝延熹七年三月癸亥隕石右扶風一鄠又隕石二皆有聲如雷

五行災變

貌之不恭是謂不肅厥咎狂

淫雨

服妖

雞禍

青眚

屋自壞

言之不從是謂不乂厥咎僭

訛言

旱

謠

狼食人

視之不明是謂不愆厥咎舒

災火

草妖

羽蟲孽

羊禍

聽之不聰是謂不謀厥咎急

大水

水變色

大寒

雹

冬雷

山鳴

魚孽

蝗

思之不睿是謂不聖厥咎濇

地震

山崩

地陷

大風拔木

螟

牛疫

皇之不極是謂不建厥咎眊

射妖

龍蛇孽 馬禍

人痾

人化

死復生 疫

投蜺

日蝕

日抱

日黃珥

日赤無光

日中黑

虹貫日

月蝕非其月

五行傳說及其占應漢書五行志錄之詳矣故泰山太守應劭給事中董巴散騎常侍譙周並撰建武以來災異今合而論之以續前志云

已上詳見五行志此不具載

東漢會要卷十六

番禺王國瑞校

東漢會要卷十七

宋

徐

天

麟

撰

封建上

封皇子

世祖初大司馬吳漢請封皇子不許重奏連歲建武十五年三月乃詔羣臣議大司空融固始侯通膠東侯復高密侯禹太常登等奏議曰古者封建諸侯以蕃屏京師周封八百同姓諸姬並為建國夾輔王室尊事天子享國永長為後世法故詩云大啟爾宇為周室輔高祖聖德光有天下亦務親親封立兄弟諸

身漢書卷之七
子不違舊章陛下德橫天地興復宗統褒德賞勳親睦九族功臣宗室咸蒙封爵多受廣地或連屬縣今皇子賴天能勝衣趨拜陛下恭謙克讓抑而未議羣臣百姓莫不失望宜因盛夏吉時定號位以廣蕃輔明親親尊宗廟重社稷應古合舊厭塞衆心臣請大司空上輿地圖太常擇吉日具禮儀制曰可夏四月戊申以太牢告祠宗廟丁巳使大司空融告廟封皇子輔爲右翊公英爲楚公陽爲東海公康爲濟南公蒼爲東平公延爲淮陽公荆爲山陽公衡爲臨淮公焉爲左翊公京爲琅邪公紀

明帝永平二年封皇子建爲千乘王羨爲廣平王十五年封皇子恭爲鉅鹿王黨爲樂成王衍爲下邳王暘爲汝南王昞爲常山王長爲濟陰王初帝案地圖將封皇子悉半諸國明德馬皇后見而言曰諸子食數縣於制不已儉乎帝曰我子豈宜與先帝子等乎歲給二千萬足矣皇后紀

建初四年案輿地圖令諸國戶口皆等租八歲各八

千萬陳敬王傳

皇子封王其郡爲國詳見王國官屬

諸王封者受茅土歸以立社稷百官志

封宗室

王莽居攝欲慰安宗室故不被刑誅及莽篡位立劉氏為侯者皆降稱子食卿祿後皆奪爵

城陽恭王傳

世祖建武二年十二月戊午詔曰惟宗室列侯為王莽所廢先靈無所依歸朕甚愍之其並復故國若侯身已歿屬所上其子孫見名尚書封拜

紀

十三年二月丙辰詔曰長沙王興真定王得河間王邵中山王茂皆襲爵為主不應經義其以興為臨湘侯得為真定侯邵為樂成侯茂為單父侯其宗室及絕國封侯者凡一百二十七人丁巳降趙王良為趙

公太原王章為齊公魯王興為魯公

紀

臣天麟按自昔聖王制世御極必建牧立監以蕃屏王室是以內外相維而國勢久安自秦人不師古始罷侯置守而封建之法始廢漢祖龍興取周秦之制而兼用之其亦有意於矯前世之弊矣惜乎措慮不遠封爵過制中世以後尾大之勢浸成而遂兆吳楚七國之變斯則措置之失而非封建之法不可行也故賈誼在文帝時建言欲天下治安莫若眾建諸侯而少其力至武帝世主父偃復請令諸侯得推恩分子弟以地武帝從之於是蕃

國始分而支庶畢侯列國之勢浸以消弱終西都
之世無復反者光武中興因高文疏爵之制封建
宗室故齊武魯哀汝陰輩以功安成居巢甘里輩
以親皆能乘時蹈運保有茅土蕃翼王室至明章
之世東平東海沛獻等各能謙抑令終爲一代賢
王其蹈憲網者雖或有之然無西京九起之患光
武之慮後世不亦遠乎

封先代後

見賓禮

封孔子後

見賓禮

封功臣

建武二年正月悉封諸功臣爲列侯梁侯鄧禹廣平
侯吳漢皆食四縣餘各有差下詔曰諸將業遠功大
誠欲傳於無窮其顯効未酬名籍未立者大鴻臚趣
上朕將差而錄之博士工恭議曰古帝王封諸侯不
過百里強幹弱枝所以爲治也今封四縣不合法制
帝曰古之亡國皆以無道未嘗聞功臣地多而滅亡
者也乃遣謁者卽授印綬策曰在上不驕高而不危
制節謹度滿而不溢敬之戒之傳爾子孫長爲漢藩
陰鄉侯陰識貴人之兄也以軍功當增封識叩頭曰
天下初定將帥有功者衆臣託屬掖庭仍加爵邑不

東漢書卷之七
四
可以示天下此為親戚受賞國人計功也帝從之帝
令諸將各言所樂皆占美縣河南太守丁綝獨求封
本鄉或問其故綝曰綝能薄功微得鄉享厚矣帝從
其志封新安鄉侯帝使郎中馮勤典諸侯封事勤差
量功次輕重國土遠近地勢豐薄不相踰越莫不厭

服焉

紀及
列傳

十三年大饗將士班勞策勲功臣增邑更封凡三百

六十五人

本
紀

范氏論曰中興二十八將前世以為上應二十八宿
未之詳也然咸能感會風雲奮其智勇稱為佐命亦
各智能之士也議者多非光武不以功臣任職致使
英姿茂績委而勿用然原夫深圖遠算固將有以焉
爾若乃王道既衰降及霸德猶能授受惟庸勲賢皆
序如管陽之迭升桓世先趙之同列文朝可謂兼通
矣降自秦漢世資戰力至於翼扶王運皆武人崛起
亦有鬻繒屠狗輕猾之徒或崇以連城之賞或任以
阿衡之地故勢疑則隙生力侔則亂起蕭樊且猶縲
繼信越終見菹戮不其然乎自茲以降迄于孝武宰
輔五世莫非公侯遂使縉紳道塞賢能蔽壅朝有世
及之私下多抱關之怨其懷道無聞委身草莽者亦

何可勝言故光武鑒前事之違存矯枉之志雖寇鄧之高勳景賈之鴻烈分土不過大縣數四所加特進朝請而已觀其治平臨政課職責咎將所謂道之以政齊之以刑者乎若格之功臣其傷已甚何者直繩則虧喪恩舊撓情則違廢禁典選德則功不必厚舉勞則人或未賢參任則羣心難塞並列則其微未遠不得不校其勝否卽以事相權故高秩厚祿允答元功峻文深憲責成吏職建武之世侯者百餘若夫數公者則與參國議分均休咎其餘並優以寬科全其封祿莫不終以功名延慶于後昔留侯以爲高祖悉用蕭曹故人而郭伋亦譏南陽多顯鄭興又戒功臣專任夫崇恩偏授易啟私溺之失至公均被必廣招賢之路意者不其然乎永平中顯宗追感前世功臣乃圖畫二十八將於南宮雲臺其外又有王常李通竇融卓茂合三十二人故依其本第係之篇末以志功臣之次云爾

太傅高密侯鄧禹

中山太守全椒侯馬成

大司馬廣平侯吳漢

河南尹阜成侯王梁

左將軍膠東侯賈復

琅邪太守祝阿侯陳俊

建威大將軍好時侯耿弇

驃騎大將軍參蘧侯

杜茂

執金吾雍奴侯寇恂

積弩將軍昆陽侯傅俊

征南大將軍舞陽侯岑彭

左曹合肥侯堅鐔

征西大將軍夏陽侯馮異

上谷太守淮陽侯王霸

建義大將軍鬲侯朱祐

信都太守阿陵侯任光

征虜將軍潁陽侯祭遵

豫章太守中水侯李忠

驃騎大將軍櫟陽侯景丹

右將軍槐里侯萬修

虎牙大將軍安平侯蓋延

太常靈壽侯邳彤

衛尉安成侯姚期

驃騎將軍昌成侯劉植

東郡太守東光侯耿純

橫野大將軍山桑侯王常

城門校尉朗陵侯臧宮

大司空固始侯李通

捕虜將軍揚虛侯馬武

大司空安豐侯竇融

驃騎將軍慎侯劉隆

太傅宣德侯卓茂

錄功臣後

章帝建初七年車駕西巡狩以韋彪行太常從數召入問以三輔舊事禮儀風俗彪因建言今西巡舊都宜追錄高祖中宗功臣褒顯先勲紀其子孫帝納之乃制詔京兆尹右扶風求蕭何霍光後時光無苗裔唯封何末孫熊為鄼侯建初二年已封曹參後湛為平陽侯故不復及焉彪傳

和帝永元三年十一月詔曰高祖功臣蕭曹為首有

傳世不絕之義曹相國後容城侯無嗣朕望長陵東門見二臣之寵循其遠節每有感焉忠義獲寵古今所同可遣使者以中牢祠大鴻臚求近親宜為嗣者須景風紹封以章厥功紀春秋考異郵曰夏至四十五日景風至則封有功安帝永初六年下詔曰夫仁不遺親義不忘勞興滅繼絕善善及子孫古之典也昔我光武受命中興恢宏聖緒橫被四表昭假上下光耀萬世祉祚流衍垂於罔極予末小子夙夜深思追惟勲烈披圖案籍建武元功二十八將佐命虎臣讖記有證蓋蕭曹紹封傳繼於今況此未遠而或至乏祀朕甚愍之其條二

十八將無嗣絕世若犯罪奪國其子孫應當統後者分別狀上將及景風章敘舊德顯茲遺功焉於是紹封馮異孫普子晨為平鄉侯明年二十八將絕國者皆紹封焉馮異傳案袁宏紀云封鄧禹馮異等後九人為列侯

紹封

張純高祖父安世封富平侯純少龍爵土建武初先來詣闕故得復國有司奏列侯非宗室不宜復國光武曰張純宿衛十有餘年其勿廢更封武始侯食富平之半張純傳諸紹封者皆食其國半租獨鄧康以太后戚屬食三

之二鄧康傳

分封

廣平侯吳漢薨子哀侯成嗣為奴所殺建武二十八年分漢封為三國成子旦為濯陽侯以奉漢祀旦弟盱為筑陽侯成弟國為新蔡侯

高密侯鄧禹薨帝分禹封為三國長子震為高密侯襲為昌安侯珍為夷安侯

西平侯鄧宏薨子廣德嗣後以帝師之重分西平之都鄉封廣德弟甫德為都鄉侯按西京無分封之例東都此類不一略舉數條以為例

公主子封

皇女封公主者所生之子襲母封為列侯馬定獲嘉公主子襲

封獲嘉侯馬奮平陽公主子襲封平陽侯此其類也皆傳國於後鄉亭之封則

不傳襲百官志

宰相封

漢家舊制丞相拜曰封為列侯侯霸傳

袁夢麒曰漢初丞相選用列侯至武帝用公孫宏起自疏遠未有爵邑於是封平津侯丞相封侯自此始光武中興尚仍前制伏湛代鄧禹為大司徒封陽都侯湛免以侯霸代之止封關內侯凡歷九

年而薨帝始下詔曰漢家舊制丞相拜日封爲列侯朕以軍師暴露功臣未封緣忠臣之義不欲相踰未及爵命奄然而終因追封霸爲則鄉侯其比西京之制雖未鐫削亦淹緩矣自是之後位三公者皆不復有茅土之封惟靈帝初陳蕃爲太傅錄尚書事實太后優詔封爲高鄉侯蕃固辭不受自是宰相封侯之制遂廢

外戚恩澤侯

建武十三年外戚恩澤封者四十五人紀

顯宗在位後宮之家不得封侯與政紀

章帝建初元年欲封爵諸舅太后不聽明年夏大旱言事者以爲不封外戚之故有司因此上奏宜依舊典太后詔曰凡言事者皆欲媚朕以要福耳昔王氏五侯同日俱封其時黃霧四塞不聞澍雨之應又田蚡竇嬰寵貴橫恣傾覆之禍爲世所傳故先帝防慎舅氏不合在樞機之位諸子之封裁令半楚淮陽諸國常謂我子不當與先帝子等今有司奈何欲以馬氏比陰氏乎吾爲天下母而身服大練食不求甘左右但著帛布無香熏之飾者欲身率下也以爲外親見之當傷心自勅但笑言太后素好儉前過濯龍門

上見外家問起居者車如流水馬如游龍倉頭衣綠
襦領袖正白顧視御者不及遠矣故不加譴怒但絕
歲用而已冀以默愧其心而猶懈怠無憂國忘家之
慮知臣莫若君況親屬乎吾豈可上負先帝之旨下
虧先人之德重襲西京敗亡之禍哉固不許帝省詔
悲歎復重請曰漢興舅氏之封侯猶皇子之爲王也
太后誠存謙虛奈何令臣獨不加恩三舅乎且衛尉
年尊兩校尉有大病如令不諱使臣長抱刻骨之恨
宜及吉時不可稽留太后報曰吾反覆念之思令兩
善豈徒欲獲謙遜之名而使帝受不外施之嫌哉昔

竇太后欲封王皇后之兄丞相條侯言受高祖約無
軍功非劉氏不侯今馬氏無功於國豈得與陰郭中
興之后等邪常觀富貴之家祿位重疊猶再實之木
其根必傷且人所以願封侯者欲上奉祭祀下求溫
飽耳今祭祀則受四方之珍衣食則蒙御府餘資斯
豈不足而必當得一縣乎吾計之熟矣勿有疑也夫
至孝之行安親爲上今數遭變異穀價數倍憂惶晝
夜不安坐臥而欲先營外封違慈母之拳拳乎吾素
剛急有胷中氣不可不順也若陰陽調和邊境清淨
然後行子之志吾但當含飴弄孫不能復關政矣四

年天下豐稔方垂無事帝遂封三舅廖防光皆為列

侯廖等辭遜不得已受封爵而退馬后紀

和帝元興元年追爵諡皇后父鄧訓為平壽敬侯司

空陳寵以非舊典也太尉張禹司徒徐防以為宜封

爭之連日乃從禹防議袁紀

桓帝元嘉元年以梁冀有援立之功欲褒崇殊典乃

大會公卿議其禮特進胡廣太常羊溥司隸校尉祝

恬太中大夫邊韶等咸稱冀之勲德其制度賚賞宜

比周公錫之山川土田附庸司空黃瓊獨建議曰冀

前以親迎之勞增邑三千又其子亦加封賞昔周公

輔相成王制禮作樂化致太平是以大啟土宇開地

七百今諸侯以戶邑為制不以里數為限蕭何識高

祖於泗水霍光定傾危以興國皆益戶增封以顯其

功冀可比鄧禹合食四縣賞賜之差同於霍光朝廷

從之黃瓊及梁冀傳

延熹二年光祿勳陳蕃以封爵踰制內寵愈盛乃上

疏諫曰臣聞有事社稷者社稷是為有事人君者容

悅是為今臣蒙恩聖朝備位九列見非不諫則容悅

也夫諸侯上象四七垂耀在天下應分土蕃屏上國

高祖之約非功臣不侯而聞追錄河南尹鄧萬世父

遵之微功更爵尚書令黃雋先人之絕封近習以非
義授邑左右以無功傳賞授位不料其任裂土莫紀
其功至乃一門之內侯者數人故緯象失度陰陽謬
序稼用不成民用不康臣知封事已行言之無及誠
欲陛下從是而止蕃傳

桓帝時恩澤侯以無勞受封羣臣不悅而莫敢諫趙
典獨奏曰夫無功而賞勞者不勸上忝下辱亂象干
度且高祖之誓非功臣不封宜一切削免爵土以存
舊典帝不從趙典傳

宦者封侯

和帝卽阼幼弱而竇憲兄弟專摠權威內外臣僚莫
由親接所與居者唯閹宦而已故鄭眾得專謀禁中
終除大憝遂享茅土之封超登公卿之位於是中宮

始盛焉

宦者傳按鄭眾傳云眾首謀誅
竇憲封鄴鄉侯食邑千五百戶

延熹二年桓帝以梁冀兄弟專固詔中常侍單超等
收冀及宗親黨與悉誅之封超新豐侯二萬戶徐璜
武原侯具瑗東武陽侯各萬五千戶左悺上蔡侯唐
衡汝陽侯各萬二千戶五人同日封故世謂之五侯
又封小黃門劉普趙忠等八人爲鄉侯自是權歸宦
官朝廷日亂矣宦者傳

順帝陽嘉四年初聽中官得以養子為後世襲封爵

紀

靈帝時例封宦者以中常侍呂強為都鄉侯強辭讓
懇惻固不敢當帝乃聽之因上疏曰臣聞諸侯上象
四七下裂王土高祖重約非功臣不侯所以重天爵
明勸戒也中常侍曹節王甫張讓等及侍中許相並
為列侯節等宦官祐薄品卑人賤讒諂媚主疾如忠
良而陛下不悟妄授茅土臣誠知封事已行言之無
逮實願陛下損改既謬從此一止

呂強傳

臣天麟按東漢之季閹宦擅權苴茅分虎布漢宮

聞自朱穆抗言極諫而忠鯁之士相繼論列呂強
身為中貴而能持論如此亦可以見是非之公在
人心者不容泯也

東漢會要卷十七

東漢會要卷十八

宋 徐 天 麟 撰

封建下

列侯

列侯所食縣為侯國本注曰承秦爵二十等為徹侯
金印紫綬以賞有功功大者食縣小者食鄉亭得臣
其所食吏民後避武帝諱為列侯武帝元朔二年令
諸王得推恩分眾子土國家為封亦為列侯舊列侯
奉朝請在長安者位次三公中興以來唯以功德賜
位特進者次車騎將軍賜位朝侯次五校尉賜位侍

祠侯次大夫其餘以肺附及公主子孫奉墳墓於京都者亦隨時見會位在博士議郎下

百官志胡廣曰是為猥諸侯

關內侯

承秦賜爵十九等為關內侯無土寄食在所縣民租

多少各有戶數為限

百官志如淳曰列侯出關就國侯但爵身其有家累者與之關

內之邑食其租稅

爵

承秦爵十八級合關內侯列侯為二十等

百官志

劉劭爵制曰古者天子寄軍政於六鄉居則以田警則以戰秦依古制其在軍賜爵為等級其帥人皆更

卒也有功賜爵則在軍吏之例自一爵以上至不更

四等皆士也大夫以上至五大夫五等比大夫也九

等依九命之義也自左庶長以上至大庶長九卿之

義也關內侯者依古圻內子男之義也秦都山西以

關內為王畿故曰關內侯也列侯者依古列國諸侯

之義也然則卿大夫士下之品皆放古比朝之制而

異其名亦所以殊軍國也古者以車戰兵車一乘步

卒七十二人分翼左右車大夫在左御者處中勇士

居右凡七十五人一爵曰公士者步卒之有爵為公

士者二爵曰上造造成也古者成士升於司徒曰造

士雖依此名皆步卒也三爵曰簪裹御駟馬者要裹古之名馬也駕駟馬者其形似簪故曰簪裹也四爵曰不更者為車右不復與凡更卒同也五爵曰大夫大夫者在車左者也六爵為官大夫七爵為公大夫八爵為公乘九爵為五大夫若軍吏也吏民爵不得過公乘者得賞與子若同產然則公乘者軍吏之爵最高者也雖非臨戰得公卒車故曰公乘也十爵為左庶長十一爵為右庶長十二爵為左更十三爵為中更十四爵為右更十五爵為少上造十六爵為大上造十七爵為駟車庶長十八爵為大庶長十九爵

為關內侯二十爵為列侯自左庶長已上至大庶長皆卿大夫皆軍將也所將皆庶人更卒也故以庶更為名大庶長即大將軍也左右庶長即左右偏裨將軍也
百官志注

王侯號

靈壽王 彭城靖王未封賜號靈壽王未有國邑取其美名

重熹王 樂城靖王未封賜號重熹王 承義侯 寇恂

成義侯 梁統 興義侯 耿況 奉義侯 景丹

輔義侯 庫鈞 扶義侯 辛彤 助義侯 竺曾

褒義侯 史苞 褒親侯 侯翁 褒德侯 卓茂

歸德侯

劉

褒成侯

孔志

顯親侯

賓

建策侯

吳漢

建功侯

蓋延

宣恩侯

陰就

討姦侯

杜習

折姦侯

燕廣

征羌侯

來歙

破虜侯

須沈

不義侯

蒼頭子密

破羌侯

榆鬼

率眾王

烏倫

率眾侯

其至

臣天麟按漢世封侯皆以縣邑其後或以鄉亭皆視其所食之邑而名之至於功名顯著則有特加美名者西都信武冠軍富民博陸之類是也東漢因之時有美號至於彭寵蒼頭以奴弑主而封之不義侯夫果不義則不應封爵使其功可封則非可言不義矣光武於是失之

特進侯

高密侯鄧禹以特進奉朝請

固始侯李通上大司空印綬以特進奉朝請

夷安侯鄧康以病免加位特進

賈復以列侯就第加位特進

竇篤封郎侯進位特進得舉吏

鄧隲封上蔡侯位特進

竇固封顯親侯加位特進

馬廖馬防馬光皆封列侯以特進就第

樊宏拜光祿大夫位特進次三公按宏位特進時猶未封侯建武五年

始封長羅侯陰識封陰鄉侯拜執金吾位特進

陰就封新陽侯為少府位特進

梁棠梁雍梁翟梁商俱封列侯位特進

朱雋封錢塘侯加位特進各本傳

後漢皇后父兄率為特進侯朝會位次三公通典

臣天麟按鄧騭傳云騭兄弟並奉朝請位次在三

公下特進侯上注云在特進及列侯之上此注誤

也按百官志云列侯以功德賜位特進者次車騎

將軍則此所謂特進侯者蓋謂列侯而賜位特進

者耳

侍祠侯猥諸侯

富平侯張奮來朝顯宗以為侍祠侯張奮傳

鄧禹孫康以侍祠侯為越騎校尉注引漢官儀曰諸

侯功德優盛朝廷所敬者位特進在三公下其次朝

侯在九卿下其次侍祠侯其次下土小國侯以肺腑

親公主子孫奉墳墓於京師亦隨時朝見是為猥諸

侯也鄧禹傳

小侯

四姓小侯

明帝永平九年為四姓小侯立學校注云四姓謂外戚樊氏郭氏陰氏馬氏諸子弟以非列侯故曰小侯按顏氏家訓謂以小年獲封故曰小侯

鄧禹少子鴻好籌策永平中以為小侯本傳

四姓及梁鄧小侯桓記建和二年賜帛

馬鉅為常從小侯馬防傳

王主

漢制諸王女皆封鄉亭公主儀服同鄉亭侯肅宗唯特封東平憲王蒼琅邪孝王京女為縣公主

婦人封號

顯宗時東海王疆上疏言天恩愍哀以臣無男之故

處臣三女小國侯

本傳注云即婦人封侯也若呂后之妹呂須封為臨光侯蕭何夫人

封鄧侯之類

安帝永初元年爵皇太后母陰氏為新野君

安帝乳母王聖封野王君來歷傳

延光元年追尊閻皇后母宗為滎陽君續漢志曰婦人封君儀比

公主油畫軒車帶綬以采組為緹帶各如其綬色黃金辟邪加其首為帶

順帝爵號阿母宋娥為山陽君五行志

初順帝廢為濟陰王乳母宋娥與黃門係程等共議立帝帝後遂封娥為山陽君邑五千戶尚書令左雄

上封事曰夫裂土封侯王制所重誠不宜追錄小恩

虧失大典案尚書故事無乳母爵邑之制唯先帝時
阿母王聖為野王君造生讒賊今阿母躬蹈儉約而
與王聖同爵號懼違本操乞歲以千萬給奉阿母帝
卒封之傳

陽嘉二年有地動山崩之異李固對策曰前孝安皇
帝變亂舊典封爵阿母今宋阿母雖有大功但加賞
賜足以酬其勞苦至於裂土開國實乖舊典順帝覽
其對即時出阿母還第舍傳

順烈梁皇后母追封開封君五行志
桓帝永興中封鄧皇后母宣為長安君四年更為昆

陽君

靈帝封何皇后母興為舞陽君后紀

建寧二年爵號乳母趙嬈為平氏君袁紀

梁冀為大將軍宰宣言冀有周公之功其妻宣為邑
君詔遂封冀妻孫壽為襄城君兼食陽翟租歲入五
十萬冀一門夫人女食邑稱君者七人梁冀傳

四夷國

四夷國王率眾王歸義侯邑君邑長皆有丞比郡縣

百官志

位次

列侯封邑小大不同而其位序則與公卿相配按靈
思何后紀注大縣侯位視三公小縣侯位視上卿鄉
亭侯視中二千石蓋中二千石卽九卿秩耳然百官
志云舊列侯奉朝請在長安者位次三公中興以來
惟以功德賜位特進者次車騎將軍賜位朝侯次五
校尉賜位侍祠侯次大夫其餘以肺腑及公主子孫
奉墳墓於京師者亦隨時見會位在博士議郎下而
鄧禹傳注復云諸侯功德優盛朝廷所敬者位特進
在三公下其次朝侯在九卿下是三者前後參錯未
知就正也以紀傳修

戶邑

太子食湯沐邑十縣班彪傳

永平十五年明帝案地圖將封皇子悉半諸國馬后
見而言曰諸子食數縣於制不已儉乎帝曰我子豈
宜與先帝子等乎歲給二千萬足矣明德馬后傳

列侯所食縣爲侯國公主所食湯沐曰國百官志

臣天麟按西都之制列侯封君食租稅歲率戶二
百千戶之君則二十萬至封戶多寡之目則初無
定制特視其功之大小以加之霍光封博陸侯所
食才二萬霍去病封冠軍侯所食萬七千七百餘

至後漢梁冀所食至三萬戶視西都為益廣矣

國租

明帝封諸子租歲不過二千萬

孝明八王論

肅宗按輿地圖合諸國戶口皆等租八歲各八千萬

陳敬王傳

順帝永和六年詔貸王侯國租一歲

漢安二年又貸王侯國租一歲

桓帝延熹四年貸王侯半租

五年損王侯租以助軍糧出濯龍藏錢還之

並紀

諸紹封者皆食故國半租鄧禹孫康襲父爵以太后

戚屬獨三分食二

鄧禹傳

茅土

諸王封者皆受茅土歸以立社稷禮也

百官志按蔡邕獨斷曰天

子大社封諸侯者取其土苞白茅授之以立社其國故謂之受茅土漢興唯皇子封為王者得茅土其他功臣以戶數租入為節不受茅土不立社也

朝賀

列士特進朝侯賀正月執璧

百官志

大夫無員掌奉王使至京都奉璧賀正月

北海敬王睦歲終遣中大夫奉璧朝賀

北海王興傳

中元元年春正月東海王疆沛王輔楚王英濟南王

康淮陽王延趙王盱眙皆來

紀下同

明帝永平二年九月沛王輔楚王英濟南王康淮陽王延東海王政來朝

六年正月沛王輔楚王英東平王蒼淮陽王延琅邪

王京東海王政趙王盱北海王興齊王石來朝

十一年正月沛王輔楚王英濟南王康東平王蒼淮

陽王延中山王焉琅邪王京東海王政來朝

肅宗建初七年正月沛王輔濟南王康東平王蒼中

山王焉東海王政琅邪王宇來朝

東平王上疏請詔諸王朝各賜裝錢千萬東平王加

五百萬

袁紀

安帝延光三年齊王無忌北海王普樂安王延來朝

紀

朱暉辟東平王府正月朔旦蒼當入賀故事少府給璧是時陰就為府卿驕貴吏傲不奉法蒼坐朝堂漏且盡而求璧不可得顧謂掾屬曰若之何暉望見少府主簿持璧即往給之曰我數聞璧而未嘗見請試觀之主簿以授暉暉顧召令史奉之主簿大驚遽以白就就曰朱掾義士勿復求更以他璧朝蒼既罷召暉謂曰屬者掾自視孰與藺相如帝聞壯之

朱暉傳

奉朝請

鄧騭兄弟俱以列侯奉朝請

按漢制列侯在京師無職位皆以奉朝請為名

鄧晨以西華侯奉朝請

並本傳

就國

建武六年始遣列侯就國

紀

肅宗性寬仁而親親之恩篤故叔父濟南中山二王每數入朝特加恩寵及諸昆弟並留京師不遣就國宋意以為人臣有節不宜踰禮過恩乃上疏諫曰陛下至孝烝烝恩愛隆深以濟南王康中山王焉先帝昆弟特蒙禮寵聖情戀戀不忍遠離比年朝見久留

京師崇以叔父之尊同之家人之禮車入殿門即席不拜分甘損膳賞賜優渥昔周公懷聖人之德有致太平之功然後王曰叔父加以賜幣今康焉幸以支庶享食大國陛下即位蠲除前過還所削黜衍食它縣男女少長並受爵邑恩寵踰制禮敬過度春秋之義諸父昆弟無所不臣所以尊尊卑卑彊幹弱枝者也陛下德業隆盛當為萬世典法不宜以私恩損上下之序失君臣之正又西平王羨等六王皆妻子成家官屬備具當早就蕃國為子孫基址而室第相望久磐京邑婚姻之盛過於本朝僕馬之眾充塞城郭

東漢書卷六
二
驕奢僭擬寵祿隆過今諸國之封並皆膏腴風氣平
調道路夷近朝聘有期行來不難且割情不忍以義
斷恩發遣康焉各歸蕃國令羨等速就便時以塞眾

望帝納之

宋意傳

和帝卽位陳王羨彭城王恭樂成王黨下邳王衍梁

王暘始就國

建初二年章帝不忍與諸王乖離皆留京師今遣之國

殤帝延平元年清河王慶濟北王壽河間王開常山

王章始就國

並紀

王國官屬

皇子封王其郡爲國置傅一人相一人皆二千石本

注曰傅主導王以善禮如師不臣也相如太守有長
史如郡丞漢初立諸王因項羽所立諸王之制地既
廣大且至千里又其官職傅爲大傅相爲丞相又有
御史大夫及諸卿皆秩二千石百官皆如朝廷國家
唯爲置丞相其御史大夫以下皆自置之至景帝時
吳楚七國恃其國大遂以作亂幾危漢室及其誅滅
景帝懲之遂令諸王不得治民令內史主治民改丞
相曰相省御史大夫廷尉少府宗正博士官武帝改
漢內史中尉郎中令之名而王國如故員職皆朝廷
爲補不得自置至成帝省內史治民更令相治民太

傅但曰傅中尉一人比二千石本注曰職如郡都尉
主盜賊郎中令一人僕一人皆千石本注曰郎中令
掌王大夫郎中宿衛官如光祿勳自省少府職皆并
焉僕主車及馭如太僕本注曰太僕比二千石武帝
改但曰僕又皆減其秩治書比六百石本注曰治書
本尙書更名大夫比六百石本注曰無員掌奉王使
至京都奉璧賀正月及使諸國本皆持節後去節謁
者比四百石本注曰掌冠長冠本員十六人後減禮
樂長本注曰主樂人衛士長本注曰主衛士醫工長
本注曰主醫藥永巷長本注曰宦者主宮中婢使祠
祀長本注曰主祠祀皆比四百石郎中二百石本注
曰無員百官志

侯國官屬

列侯每國置相一人其秩各如本縣本注曰主治民
如令長不臣也但納租于侯以戶數爲限其家臣置
家丞庶子各一人本注曰主侍侯使理家事列侯舊
有行人洗馬門大夫凡五官中興以來食邑千戶已
上置家丞庶子各一人不滿千戶不置家丞又悉省
行人洗馬門大夫百官志

郵典

東漢會要卷十八
三
自中興至和帝時皇子始封薨者皆賻錢三千萬布

三萬匹嗣王薨賻錢千萬布萬匹

中山簡王傳

自永初以後國用不足始封王薨減賻錢為千萬布

萬匹嗣王薨五百萬布五千匹

濟北惠王傳

東海恭王薨使大司空持節護喪事大鴻臚副宗正將作大匠視喪事贈以殊禮升龍旌頭鸞輅龍旂虎

賚百人

本傳

東平憲王薨遣大鴻臚持節五官中郎將副監喪及將作使者凡六人賜錢前後一億布九萬匹及葬加賜鸞輅乘馬龍旂九旒虎賚百人元和三年東巡狩

幸蒼陵為陳虎賁鸞輅龍旂以章顯之祠以太牢親拜祠坐哭泣盡哀賜御劔于陵前

本傳

東漢會要卷十八

東漢會要卷十九

宋

徐

天

麟

撰

職官一

總敘

漢之初興永繼大亂兵不及戢法度草創略依秦制
 後嗣因循至景帝感吳楚之難始抑損諸侯王及至
 武帝多所改作然而奢廣民用匱乏世祖中興務從
 節約并官省職費減億計所以補復殘缺及身未改
 而四海從風中國安樂者也昔周公作周官分職著
 明法度相持王室雖微猶能久存今其遺書所以觀

周室牧民之德既至又其有益來事之範殆未有所窮也故親汲合王隆作小學漢官篇諸文倜說畧不究唯班固著百官公卿表記漢承秦置官本末訖于王莽差有條貫然皆孝武奢廣之事又職分未悉世祖節約之制宜為常憲故依其官簿粗注職分以為百官志凡置官之本及中興所省無因復見者既在漢書百官表不復悉載

百官志

太傅

太傅上公一人本注曰掌以善導無常職世祖以卓茂為太傅薨因省其後每帝初即位輒置太傅錄尚

書事薨輒省

章紀注云武帝以張子孺領尚書事錄尚書事由此始

錄尚書事

趙熹 鄧彪 張禹 馮石 馮 鮪 桓焉 趙浚 陳蕃 胡廣

太尉

太尉司徒司空為三公

太尉公一人本注曰掌四方兵事功課歲盡即奏其殿最而行賞罰凡郊祀之事掌亞獻凡國有大造大疑則與司徒司空通而論之國有過事則與二公通諫爭之世祖即位為大司馬建武二十七年改為太尉長史一人千石本注曰書諸曹事掾史屬二十四人本注曰漢舊注東西曹掾比四百石餘掾比三百石屬比二百石故曰公府掾比古元士三命者也或

曰漢初掾史辟皆上言之故有秩比命士其所不言則為百石屬其後皆自辟除故通為百石云西曹主府史署用東曹主二千石長吏遷除及軍吏戶曹主民戶祠祀農桑奏曹主奏議事辭曹主辭訟事法曹主郵驛科程事尉曹主卒徒轉運事賊曹主盜賊事決曹主罪法事兵曹主兵事金曹主貨幣鹽鐵事倉曹主倉穀事黃閣主簿錄省眾事令史及御屬二十三人本注曰漢舊注公令史百石自中興以後注不說石數御屬主為公御閣下令史主閣下威儀事記室令史主上章表報書記門令史主府門其餘令史

各典曹文書

錄尚書事

年融 尹睦 徐防 趙熹
朱寵 劉光 龐參 李固
胡廣 周忠
楊彪

在外除拜

中平三年遣使者持節就長安拜張溫為太尉三公在外始之於溫

司徒

司徒公一人本注曰掌人民事凡教民孝悌遜順謙儉養生送死之事則議其制建其度凡四方民事功課歲盡則奏其殿最而行賞罰凡郊祀之事掌省牲視濯凡國有大疑大事與太尉同世祖即位為大司徒建武二十七年去大獻帝建安十三年罷司徒置丞相長史一人

千石掾屬三十一人令史及御屬三十六人本注曰

世祖即位以武帝故事置丞相司直居丞相府助督

錄諸州建武十八年省也獻帝建安十八年復置司直不屬司徒掌督中都

官不領諸州九年十二月詔司直此司隸校尉坐同席在上假傳置從事三人書佐四人

錄尚書事

趙戒 胡廣 王允 涪于嘉 趙温

司徒府中有百官朝會殿天子與丞相決大事每

國有大議天子車駕親幸其殿每歲州郡聽採長

吏臧否民所疾苦還條奏之志注

司空

司空公一人本注曰掌水土事凡營城起邑浚溝洫

修墳防之事則議其利建其功凡四方水土功課歲

盡則奏其殿最而行賞罰凡郊祀之事掌掃除樂器

凡國有大造大疑諫爭與太尉同世祖即位為大司

空建武二十七年去大屬長史一人千石掾屬二十

九人令史及御屬四十二人獻帝建安十三年罷司空置御史大夫荀綽百

官表注曰獻帝置御史大夫職如司空不領侍御史

錄尚書事

楊彪

三公雜錄

後漢唯有太傅一人謂之上公及有太尉司徒司空

而無師保董卓盜為太師非漢本制太尉公主天部太常衛尉光錄勳司徒

東漢書卷之九
四
公主人

部太僕鴻臚廷尉

司空公主地

部宗正少府司農

而分部九

卿蓋多以九卿為之若天地災變則皆册免自太尉

徐防始焉

後漢本制災變唯免太尉自徐防為太尉凡天地災變三公皆免

漢制三公不與盜賊若領兵入見皆交戟叉頸而前

使虎賁執刃扶之也

朝臣見三公皆拜天子御坐即起在輿為

下凡拜公天子臨軒六百石以上悉會直事卿贊拜

御史授印綬三遜然後受至安帝時三府任簿選舉

誅賞一由尚書其灾眚變咎則責免公台靈帝臨朝

始遣使者就長安拜張温為太尉三公在外自此始

也至獻帝建安十三年乃罷三公官

通典

漢世故事三公之職無所不統

楊秉傳

光武明帝躬好吏事亦以課覈三公

朱浮傳

光武雖置三公事歸臺閣

仲長統傳臺閣謂尚書也

漢興舊事丞相所請靡有不聽

陳忠傳

三公領兵朝見令虎賁執刃挾之

伏后紀

故事三公不與賊盜

何敞傳

三公以灾異策免自徐防始

本傳

順帝永建元年初令三公尚書入奏事

紀

三公尊重是以舊典不有大罪不加重問

司隸校尉不察三公

陳允傳詳見刺舉條

獻帝建安十三年六月罷三公官置丞相御史大夫
紀

將軍

自大傳至將軍為五府

將軍不常置本注曰掌征伐背叛比公者四第一大將軍次驃騎將軍次車騎將軍次衛將軍又有前後左右將軍初武帝以衛青數征伐有功以為大將軍欲尊寵之以古尊官唯有三公階將軍始自秦晉以為卿號故置大司馬官號以冠之其後霍光王鳳等皆然成帝綏和元年賜大司馬印綬罷將軍官世祖中興吳漢以大將軍為大司馬景丹為驃騎大將軍

位在公下及前後左右雜號將軍眾多皆主征伐事訖皆罷明帝初即位以弟東平王蒼有賢才以為驃騎將軍以王故位在公上數年後罷章帝即位西羌反故以舅馬防行車騎將軍征之還後罷和帝即位以舅竇憲為車騎將軍征匈奴位在公下還復有功遷大將軍位在公上復征西羌還免官罷安帝即位西羌寇亂復以舅鄧騭為車騎將軍征之還遷大將軍位如憲數年復罷自安帝政治衰缺始以嫡舅耿寶為大將軍常在京都順帝即位又以皇后父兄相繼為大將軍如三公焉長史司馬皆一人千石本注

曰司馬主兵如太尉從事中郎二人六百石本注曰職參謀議掾屬二十九人令史及御屬三十一人本注曰此皆府員職也又賜官騎三十人及鼓吹其領軍皆有部曲大將軍營五部部校尉一人比二千石軍司馬一人比千石部下有曲曲有軍候一人比六百石曲下有屯屯長一人比二百石其不置校尉部但軍司馬一人又有軍假司馬假候皆為副貳其別營領屬為別部司馬其兵多少各隨時宜門有門候其餘將軍置以征伐無員職亦有部曲司馬軍候以領兵其職吏部集各一人總知營事兵曹掾史主兵事器械稟假掾史主稟假禁司又置外刺刺姦主罪法明帝初置度遼將軍以衛南單于眾新降有二心者後數有不安遂為常守

大將軍錄尚書事

梁冀

竇武

何進

十日一入平尚書事

梁冀

建威大將軍

景奔

建威將軍

鄧尋

建義大將軍

朱祐

振威將軍

宋登

疆弩大將軍

陳俊

疆弩將軍

陳俊

虎牙大將軍

蓋延

積弩將軍

馮音

征南大將軍

岑彭

積射將軍

焦進

征西大將軍

馮異

征西將軍

耿秉 司馬鈞 馬賢

河西大將軍

竇融

征虜將軍

祭遵

西州大將軍

隗囂

誅虜將軍

劉隆 王霸

橫野大將軍

王常

捕虜將軍

馬武

驍騎將軍

劉振

樊崇 劉喜

威虜將軍

馮駿

越騎將軍

劉宏

討虜將軍

王霸

復漢將軍

劉曄

破虜將軍

鄧奉 董卓 賈復

輔漢將軍

于康

破姦將軍

侯進

輔威將軍

臧宮

刺姦將軍

祭遵

武威將軍

劉尚

游擊將軍

鄧隆

武鋒將軍

竺曾

樓船將軍

段志

平狄將軍

一作平敵

將軍

龐萌 鮪 孫咸

孟津將軍

馮異

赤眉將軍

耿訴

都護將軍

賈復

中堅將軍

杜茂

揚化將軍

堅鐔

宣德將軍

梁統

忠義將軍

陸康

伏波將軍

馬援

揚武將軍

馬成

漢忠將軍

王常 漢中誤也 或作

威寇將軍

楊茂

度遼將軍

明帝已 後常置

偏將軍

王霸

盪寇將軍

周盛見 董卓傳

興義將軍

楊奉

安集將軍

董承

太常

自太常至少
府為九卿

太常卿一人中二千石本注曰掌禮儀祭祀每祭祀
先奏其禮儀及行事常贊天子每選試博士奏其能
否大射養老大喪皆奏其禮儀每月前晦察行陵廟
丞一人比千石本注曰掌凡行禮及祭祀小事總署
曹事其署曹掾史隨事為員諸卿皆然

太史令一人六百石本注曰掌天時星厯凡歲時終
奏新年厯凡國祭祀喪娶之事掌奏良日及時節禁
忌凡國有瑞應災異掌記之丞一人明堂及靈臺丞
一人二百石本注曰五丞掌守明堂靈臺掌候日月

星氣皆屬太史

博士祭酒一人六百石太僕射中興轉為祭酒博士
十四人比六百石本注曰易四施孟梁邱京氏尚書
三歐陽大小夏侯氏詩三魯齊韓氏禮二大小戴氏
春秋三公羊嚴顏氏掌教弟子國有疑事掌承問對
本四百石宣帝增秩

秘書監

桓紀延熹
二年置

校書郎

竇章入東觀為校書
郎馬融拜校書郎中

東觀郎

李勝為東觀
郎見李尤傳

五經大夫

祭遵奏置五經
大夫見本傳

講郎

儒林傳肅宗詔高才主受古文尚書毛詩穀梁左氏春秋雖不立學官然皆擢高第為講郎給事近署

太祝令一人六百石本注曰凡國祭祀掌讀祝及迎送神丞一人本注曰掌祝小神事

太宰令一人六百石本注曰掌宰工鼎俎饌具之物凡國祭祀掌陳饌具丞一人

大序樂令一人六百石本注曰掌伎樂凡國祭祀掌請奏樂及大饗用樂掌其陳序丞一人

高廟令一人六百石本注曰守廟掌案行掃除無丞世祖廟令一人六百石本注曰如高廟

先帝陵每陵園令各一人六百石本注曰掌守陵園案行掃除丞及校長各一人本注曰校長主兵戎盜賊事

先帝陵每陵食官令各一人六百石本注曰掌望晦時節祭祀

右屬太常本注曰有祠祀令一人後轉屬少府有太卜令六百石後省并太史中興以來省前凡十官

光祿勳

光祿勳卿一人中二千石本注曰掌宿衛宮殿門戶

典謁署郎更直執戟宿衛門戶考其德行而進退之
郊祀之事掌三獻丞一人比千石

五官中郎將一人比二千石本注曰主五官郎五官
中郎比六百石本注曰無員五官侍郎比四百石本
注曰無員五官郎中比三百石本注曰無員凡郎官
皆主更直執戟宿衛諸殿門出充車騎唯議郎不在

直中

左中郎將比二千石本注曰主左署郎中郎比六百

石侍郎比四百石郎中比三百石本注曰皆無員

右中郎將比二千石本注曰主右署郎中郎比六百

石侍郎比四百石郎中比三百石本注曰皆無員

虎賁中郎將比二千石本注曰主虎賁宿衛前書武帝置期

門平帝更名虎賁左右僕射左右陛長各一人比六百石本

注曰僕射主虎賁郎習射陛長主直虎賁朝會在殿

中虎賁中郎比六百石虎賁侍郎比四百石虎賁郎

中比三百石荀綽晉百官表注曰虎賁諸郎皆父死子代漢制也節從虎賁比

二百石本注曰皆無員掌宿衛侍從自節從虎賁久

者轉遷才能差高至中郎

羽林中郎將比二千石本注曰主羽林郎案漢末又有四中郎

將皆帥師征伐不知何時置董卓為東中郎將羽林

郎比三百石本注曰無員掌宿衛侍從常選漢陽隴

西安定北地上郡西河凡六郡良家補本武帝以便

馬從獵還宿殿陛巖下室中號巖郎前書曰初置名建章營騎後更

名羽林左監一人六百石本注曰主羽林左騎丞一

人羽林右監一人六百石本注曰主羽林右騎丞一

人

奉車都尉比二千石本注曰無員掌御乘輿車

駙馬都尉比二千石本注曰無員掌駙馬

騎都尉比二千石本注曰無員本監羽林騎

光祿大夫比二千石本注曰無員凡大夫議郎皆掌

顧問應對無常事唯詔命所使

太中大夫千石本注曰無員

中散大夫六百石本注曰無員

諫議大夫六百石本注曰無員胡廣曰光祿大夫本為中大夫武帝元狩

五年置諫大夫為光祿大夫世祖中興以為諫議大夫

議郎六百石本注曰無員

謁者僕射一人比千石本注曰為謁者臺率主謁者

天子出奉引古重習武有主射以督錄之故曰僕射

常侍謁者五人比六百石本注曰主殿上持節威儀

謁者三十人其給事謁者四百石其灌謁者郎中比

三百石本注曰掌賓贊受事及上章報問本員七十

人中興但三十人荀綽晉百官表注曰漢皆用孝廉年五十歲容嚴恪能賓者為之

初為灌謁者滿歲為給事謁者灌謁者解見雷義傳

右屬光祿勳本注曰職屬光祿者自五官將至羽

林右監凡七署自奉車都尉至謁者以文屬焉舊

有左右曹秩以二千石上殿中主受尚書奏事平

省之世祖省使小黃門郎受事車駕出給黃門郎

兼有請室令車駕出在前請所幸微車迎白示重

慎中興但以郎兼事訖罷又省車戶騎凡三將及

羽林令

衛尉

衛尉卿一人中二千石本注曰掌宮門衛士宮中徼

循事丞一人比千石

公車司馬令一人六百石本注曰掌宮南闕門凡吏

民上章四方貢獻及召詣公車者丞尉各一人本注

曰丞選曉諱掌知非法尉主闕門兵禁戒非常

南宮衛士令一人六百石本注曰掌南宮衛士丞一

人

北宮衛士令一人六百石本注曰掌北宮衛士丞一

人

左右都候各一人六百石本注曰主劔戟士徼循宮及天子有所收考丞各一人

宮掖門每門司馬一人比千石本注曰南宮南屯司馬主平城門北宮門蒼龍司馬主東門元武司馬主元武門北屯司馬主北門北宮朱爵司馬主南掖門東明司馬主東門朔平司馬主北門凡七門凡居宮中者皆有口籍於門之所屬宮名兩字為鐵印文符案省符乃內之若外人以事當入本宮長吏為封棨傳其有官位出入令御者言其官

右屬衛尉本注曰中興省旅賁令衛士一人丞漢官

目錄曰右三卿太尉所部

太僕

太僕卿一人中二千石本注曰掌車馬天子每出奏駕上鹵簿用大駕則執馭丞一人比千石

考工令一人六百石本注曰主作兵器弓弩刀鎧之屬成則傳執金吾人武庫及主織綬諸雜工左右丞各一人

車府令一人六百石本注曰主乘輿諸車丞一人

未央殿令一人六百石本注曰主乘輿及殿中諸馬

長樂殿丞一人

右屬太僕本注曰舊有六廄皆六百石令中興省約但置一廄後置左駿令廄別主乘輿御馬後或并省又有牧師苑皆令官主養馬分在河西六郡界中中興皆省唯漢陽有流馬苑但以羽林郎監領

廷尉

廷尉卿一人中二千石本注曰掌平獄奏當所應凡郡國讞疑罪皆處當以報正左監各一人左平一人六百石本注曰掌平決詔獄

右屬廷尉本注曰孝武帝以下置中都官獄二十
六所各令長名世祖中興皆省唯廷尉及雒陽有詔獄

大鴻臚

大鴻臚卿一人中二千石本注曰掌諸侯及四方歸義蠻夷其郊廟行禮贊導請行事既可以命郡司諸王入朝當郊迎典其禮儀及郡國上計正四方來亦屬焉皇子拜王贊授印綬及拜諸侯嗣子及四方夷狄封者臺下鴻臚召拜之王薨則使弔之及拜王嗣丞一人比千石

大行令一人六百石本注曰主諸郎丞一人治禮郎

四十七人

右屬大鴻臚本注曰承秦有典屬國別主四方夷

狄朝貢侍子成帝時省并大鴻臚中興省驛官別

火二令丞及郡邸長丞但令郎治郡邸漢官目錄曰右三卿

司徒所部

宗正

宗正卿一人中二千石本注曰掌序錄王國嫡庶之

次及諸宗室親屬遠近郡國歲因計上宗室名籍若

有犯法當髡以上先上諸宗正宗正以聞乃報決胡廣

曰又歲一治諸王世譜差序秩第丞一人比千石

諸公王每主家各一人六百石丞一人三百石本注

曰其餘屬吏增減無常

右屬宗正本注曰中興省都司空令丞

大司農

大司農卿一人中二千石本注曰掌諸錢穀金帛諸

貨幣郡國四時上月旦見錢穀簿其逋未畢各具別

之邊郡諸官請調度者皆為報給損多益寡取相給

足丞一人比千石部丞一人六百石本注曰部丞主

帑藏

太倉令一人六百石本注曰主受郡國傳漕穀丞一

人

平準令一人六百石本注曰掌知物靈帝熹平四年改為中準主練染作采

色丞一人

使宦者為令列於內庭

導官令一人六百石本注曰主春御米及作乾糲導

擇也丞一人

右屬大司農本注曰郡國鹽官鐵官本屬司農中

興皆屬郡縣又有廩犧令六百石掌祭祀犧牲鴈

鶩之屬及雒陽市長滎陽敖倉官中興皆屬河南

尹餘均輸等皆省

少府

少府卿一人中二千石本注曰掌中服御諸物衣服

寶貨珍席之屬丞一人比千石

太醫令一人六百石本注曰掌諸醫藥丞方丞各一

人本注曰藥丞主藥方丞主藥方

太官令一人六百石本注曰掌御飲食左丞甘丞湯

官丞果丞各一人本注曰左丞主飲食甘丞主膳具

湯官丞主酒果丞主果

守宮令一人六百石本注曰主御紙筆墨及尚書財

用諸物及封泥丞一人

上林苑令一人六百石本注曰主苑中禽獸頗有民

居皆主之捕得其獸送大官丞尉各二人

侍中比二千石本注曰無員掌侍左贊導眾事顧

問應對法駕出則多識者一人參乘餘皆騎在乘輿

車後本有僕射一人中興轉為祭酒或置或否獻帝紀注

漢官儀曰侍中左蟬右貂本秦丞相史往來殿內故謂之侍中分掌乘輿服物下至褻器虎子之屬武帝

時孔安國為侍中以其儒者特聽掌御唾壺朝延榮之至東京屬少府駕出則一人負傳國璽操斬蛇劍

乘輿中官俱止禁中又百官志注侍中舊典與中官俱止禁中武帝時侍中莽何羅拔刀謀逆由是侍中

出禁外有事乃入畢即出王莽秉政侍中復入與中官共止章帝元和中侍中郭舉與後宮通拔佩刀驚

上舉伏誅侍中由是復出外

中常侍千石本注曰宦者無員後增秩比二千石掌

侍左右從入宮內贊導眾事顧問應對給事

黃門侍郎六百石本注曰無員掌侍從左右給

事中關通中外及諸王朝見於殿上引王就坐漢舊儀曰

黃門郎屬黃門令日暮入對青瑣門拜名曰夕郎宮閣簿青瑣門在南宮衛權注吳都賦曰青瑣戶邊青

鏤也一日天子門內有眉格再重裏青畫曰瑣獻帝起居注曰帝初即位初置侍中給事黃門侍郎員

各六人出入禁中近侍帷幄省尚書事舊侍中黃門侍郎以在中宮者不與近密交政誅黃門後侍中侍

郎出入禁闈機事頗露由是王允乃奏比尚書不得出入不通賓客由此始也

獻帝即位初令侍中給事黃門侍郎員各六人賜

公卿以下至黃門侍郎家一人為中以補宦官所

領諸曹侍於殿上本紀靈帝熹平四年改平準使宦者為令自早諸內曹令丞悉

以奄人為之故今並令士人代領之

小黃門六百石本注曰宦者無員掌左右受尚書

事上在內宮關通中外及中宮已下眾事

黃門令一人六百石

董巴曰禁門曰黃闥以中本注人主之故號曰黃門令

曰宦者主省中諸宦者丞從丞各一人本注曰宦者

從丞主出入從

黃門署長畫室署長玉堂署長各一人丙署長七人

皆四百石黃綬本注曰宦者各主中宮別處

中黃門冗從僕射一人六百石本注曰宦者主中黃

門冗從居則宿衛直守門戶出則騎從夾乘輿車

永初元年詔減黃門鼓吹以補羽林士

中黃門比百石本注曰宦者無員後增比三百石掌

給事禁中

掖庭令一人六百石本注曰宦者掌後宮貴人采女

事左右丞暴室丞各一人本注曰宦者暴室丞主中

婦人疾病者就此室治其皇后貴人有罪亦就此室

丞巷令一人六百石本注曰宦者典官婢侍使丞一

人本注曰宦者

御府令一人六百石本注曰宦者典宮婢作中衣服

及補浣之屬丞織室丞各一人本注曰宦者

東漢書卷之九
祠祀令一人六百石本注曰典中詠小祠祀丞一人
本注曰宦者

鈎盾令一人六百石本注曰宦者典諸近池苑園遊
觀之處丞永安丞各一人三百石本注曰宦者永安
北宮東北別小宮名有園觀苑中丞果丞鴻池丞南
園丞各一人二百石本注曰苑中丞主苑中離宮果
丞主果園鴻池池名在雒陽東二十里南園在雒水
南濯龍監直里監各一人四百石本注曰濯龍亦園
名近北宮直里亦園名也在雒陽城西南角

中藏府令一人六百石本注曰掌中幣帛金銀諸貨
物丞一人

內者令一人六百石本注曰掌中布張諸衣物左右
丞各一人

尙方令一人六百石本注曰掌上手工作御刀劍諸
好器物丞一人

尙書令一人千石本注曰承秦所置武帝用宦者更
爲中書謁者合成帝用士人復故掌凡選署及奏下
尙書曹文書衆事

尙書僕射一人六百石本注曰署尙書事令不在則
奏下衆事

尚書六人六百石本注曰成帝初罷尚書四人分爲四曹常侍曹尚書主公卿事二千石尚書主郡國二千石事民曹尚書主凡吏上書事客曹尚書主外國夷狄事世祖承遵後分二千石曹又分客曹爲南主客曹北主客曹凡六曹

左右丞各一人四百石本注曰掌錄文書期會左丞主吏民章報及駟伯史右丞假署印綬及紙筆墨諸財用庫藏

侍郎三十六人四百石本注曰一曹有六人主作文書起草令史十八人二百石本注曰曹有三主書後

增劇曹三人合二十一人洪錄注曰故事尚書郎以用孝廉爲郎

臣天麟按元帝時蕭望之領尚書事建白以爲尚書百官之本國家樞機宜以通明公正處之武帝游宴後庭故用宦者非古制也宜罷中書宦者應古不近刑人之制方是時宏恭石顯相繼爲中書令邪僻擅權元帝溺於近習不能有所改至成帝建始四年懲恭顯之惡遂罷中書宦官置尚書員四人分爲四曹光武中興稍更其制按晉書職官志云光武以三公曹主歲盡考理諸州郡事改常

侍曹爲吏部曹主選舉祠祀事戶曹主膳修工作
鹽池園苑事客曹主護駕羌胡朝事二千石曹
主詞訟事中郎官曹主水火盜賊事合爲六曹并
令僕二人謂之八座據此所載與范史本注小有
不同然尙書雖有曹名而未以名官至靈帝以侍
中梁鴻爲選郎尙書於是始入銜矣考之於史章
帝世韋彪上言天下樞要皆在尙書尙書之選豈
可不重而間者多從郎官超升此位雖曉習文法
長於應對然察察少慧類無大能宜簡嘗歷州宰
素有名者順帝朝李固上言陛下之有尙書猶天
之有北斗也斗爲天喉舌尙書亦爲陛下喉舌斗
斟酌元氣運平四時尙書出納王命賦政四海誠
宜審擇其人以毗聖政由此言之尙書在東京權
任之重過於西漢而選任之輕若此宜乎政理日
以浸衰也

符節令一人六百石本注曰爲符節臺率主符節事
凡遣使掌授節尙符璽郎中四人本注曰舊二人在
中主璽及虎符竹符之半者符節令史二百石本注

曰掌書

魏氏春秋日中平六年始復節上赤葆

御史中丞一人千石本注曰御史大夫之丞也舊別

監御史在殿中密舉非法及御史之夫轉爲司空因別留中爲御史臺率後又屬少府

治書侍御史二人六百石本注曰掌選明法律者爲之凡天下諸讞疑事掌以法律當其是非侍御史十五人六百石本注曰掌察舉非法受公卿羣吏奏事有違失舉劾之凡郊廟之祠及大朝會大封拜則一人監威儀有違失則劾奏

蘭臺令史六百石本注曰掌奏及印工文書

右屬少府本注曰職屬少府者自太醫上林凡四官自侍中至御史皆以文屬焉承秦凡山澤陂池

之稅名曰禁錢屬少府世祖改屬司農考工轉屬太僕都水屬郡國孝武帝初置水衡都尉秩比二千石別主上林苑有離官燕休之處世祖省之并其職於少府每立秋獬劉之日輒暫置水衡都尉事訖乃罷之少府本六丞省五又省湯官織室令置丞又省上林十池監胞人長丞宦者昆臺飲飛三令二十一丞又省水衡屬官令長丞尉二十餘人章和以下中官稍廣加嘗藥太官御者鈎盾尚方考工別作監皆六百石宦者爲之轉爲兼副或

省故錄本官

漢官目錄曰古三卿司空所部

東漢會要卷十九

番禺

王國瑞校
黎永椿校

